
БЕШАРИҚДА ГУЛЧИЛИК ЖАДАЛ РИВОЖЛАНАЁТГАН БИЗНЕСГА АЙЛАНМОҚДА

Тумандаги ўнлаб оилаларда парваришланаётган ранг-баранг гуллар Фарғона водийси, пойтахтимиз ва мамлакатимизнинг бошқа ҳудудларига етказиб берилмоқда.

Бешариқ тумани марказидаги «Гулилола дунёси» оилавий корхонасида эса 25 турда Голландия лолалари етиштириляпти.

Ўтган йили Голландиядан лола илдизларини келтирган бу гулчилар оиласи 60 сотихли иссиқхонада уларни парваришлай бошлади. Эътибор, меҳр ва парваришдан барқ урган анвойи лолалар мамлакатимиз шаҳарлари, қўшни республикалар, Жанубий Кореяга экспорт қилинмоқда.

- Ҳар бир лола илдизи 3-3,5 минг сўмдан олиниб, уч ой парвариш қилинади ва битта лола гули ички бозорда ўртача 15-20 минг сўмдан сотилади, экспортга чиқариладигани янада қиммат, - дейди Гулираъно Раҳимжонова. - Шу тариқа оиламиз гулчиликдан йилига 60 миллион сўм соф фойда олади.

Оилавий корхонада 12 та доимий иш ўрни яратилган, мавсумий юмушларга яна 10 нафардан зиёд маҳалладошлар жалб этилади. Боиси томорқадан бир йилда тўрт маротаба ҳосил оладиган оила гулчиликдан ташқари турли кўкатлар етиштириш орқали ҳам қўшимча даромад қилади.

Бизни ижтимоий тармоқларда кузатинг [Facebook](#), [Telegram](#), [Facebook](#), [YouTube](#), [Instagram](#)

2022-03-09 16:05:58